

All quotations from scripture are shown here in boldface. Marginal citations are given here in brackets.

O Grundgütiger Gott/ barmhertziger Vater: Dir sey Lob/ Ehr/ Preis/ vnd Danck gesaget/ daß du die bey dem zu Leipzig gehaltenem Convent verhandene Evangelische vnd protestirende/ Churfürsten vnd Stände/ bey guter Gesundheit vnd gewünschter Einigkeit erhalten: daß du auch zu jhren fürgehabten Christlichen Rath- vnd Anschlägen deinen Heiligen guten Geist/ den **Geist der Weißheit vnd des Verstandes/ den Geist der Krafft vnd der Stärcke**/ [marg: Isaiah 11] so mildiglich verliehen/ vnd sie also regieret vnd geführet hast/ daß sie dasjenige haben berathschlaget vnd beschlossen/ was dir zu Ehren/ deiner wehrten Christenheit zum besten/ auch wieder Anrichtung gutes Verständnis/ vnd sichern beständigen Friedens gereicht vnd dienet: O Herre Gott/ bey dir allein ist vnd stehet **Rath vnd That** [marg: Proverb. 8]: Du allein bist der Brunnenquell aller Weißheit vnd Glückseligkeit. So rühmen wir derowegen deinen allerheiligsten Namen/ daß du mit deiner Gnade nicht allein der Churfürstl. Durchl. zu Sachsen/ als dem hochansehnlichsten Herrn Directorn dieses Convents/ sondern auch den andern sämtlichen Churfürsten vnd Ständen/ so wol selbst/ als jren Räthen beygewohnt/ vnd sie allerseits auff rechter Bahn geleitet und geführet hast.

O trewer Gott/ erhalte die Hochlöblichen Stände/ sampt vnd sonders bey langem Leben/ vnd aller gedeylicher Wolfahrt/ an Seel vnd Leib. Gib aber auch O Himmlischer Vater Gedeyen vnd Segen/ daß alles dasjenige/ so einmütig vnd wolbedächtig beschlossen ist/ möge glücklich zu Werck gerichtet/ vnd aller fürhabender/ heiliger/ guter Zweck vnfehlbarlich erreicht vnd erlanget werden.

Ach liebster Herr vnd Gott/ [marg: Psalm 90] **kehre dich doch dermalen eins wieder zu vns/ vnd sey deinen Knechten gnädig. Fülle vns frühe mit deiner Gnade/ so wollen wir rühmen vnd frölich seyn vnser Lebenlang. Erfreue vns nu wieder/ nach dem du vns so lange geplaget/ nach dem wir so lange Unglück gelitten.**

Zeige deinen Knechten deine grosse Gnaden- vnd Wunderwerck/ die du vor diesem deinem Volck erwiesen hast/ zeige deines Namens Ehre vnsern Kindern vnd Nachkommen.

Vnd du Herr Gott sey vns freundlich/ fördere du das Werck vnserer Hände bey vns/ [marg: Psalm 85] ja das Werck vnser Hände wollestu allezeit fördern. Ach **Herr erzeige vns deine Gnade/ vnd hilf vns/ laß vns hören/ daß du redest/ vnd Friede zugesagt deinem Volck vnd deinen Heiligen / auff daß sie nicht auff eine Thorheit gerathen/ laß deine Hülff vns nahe seyn/ daß in vnsern Landen Ehre wohne/ daß Güte vnd Trewe einander begegnen/ Gerechtigkeit vnd Friede sich küssen/** daß Trewe auff der Erden wachse vnd Gerechtigkeit vom Himmel schawe: thue diß alles aus lauter Gnaden vnd Barmhertzigkeit/ O Herre Gott/ Vater/ Sohn Jesu Christe/ vnd Heiliger Geist/ Du Einiger/ Wahrer/ Hochgelobter/ Hochgebenedeyter Gott/ von Ewigkeit zu Ewigkeit/ Amen/ Amen.

Hierauff ist mit lauter Stimm/ vnd mit einer herrlichen *Vocal* vnd *Instrumental Music*, auch mit Trometen vnd Heerpauken das *Te DEUM laudamus* gesungen/ vnd also der ansehliche Christlöbliche *Convent* mit schuldiger Dancksagung gegen Gott glücklich beschlossen worden.

¹ Matthias Hoë von Hoënegg, *Leipzigerische Schluß-Predigt/ Von der Fürsten guten Fürstlichen Gedancken* (Leipzig: Schürer, Götze, 1631), signature E2r–4r. Digitized by D-HAu, <https://nbn-resolving.de/urn:nbn:de:gbv:3:1-18722>, pp. [39–43].